



Selasa, 10 Agustus 2021

Ogen: Keluaren 35:30-35



Kepentaren, kengasupen ras pengertin



Tanggal 10 Agustus jadi sada wari ersejarah ibas negaranta siigelari hari kebangkitan teknologi nasional (harteknas). Tujunna eme guna ngergai anak bangsa si enggo ngembangken ilmuna, nguasai dinging nggunakenca. Bagepe guna njemba ia gelah tetap ngasup ngembangken inovasi ras kreativitasna. Tonggak sejarah enda ibenaken ibas tanggal 10 Agustus 1995 i Bandung ija ilakoken penerbangan pemena pesawat terbang N-250 Gatotkaca.

Ngergai kalak si pentar, ngembangken pemeteh rikut situasi ras kecibalna sada hal sipenting kal ibas kegeluhen. Alu ngergai ia tentuna ije kita nginget maka Dibata me simereken kepentaren ras kesempatan guna ncidahkenca alu erbage bentuk kiniulin arah kepentaren si lit. Bageme ibas renungeta sendah maka Musa pe meteh ras nandai kalak si ertalenta itengah-tengah bangsa Israel. Ikatakenna maka Besalel enggo ipilih Dibata dinging ibere kepentaren, kengasupen ras pengertin guna erbahan erbage jenis barang guna Kemah si Badia rikut ras kai siperlu ibas kegeluhen bangsa enda. Bagepe radu ras Oholiap, ija kepentaren e la terjeng guna dirina jine tapi pe ngajari kalak sideban guna dahin si mehuli e.

Tentuna itengah-tengahta pe nterem kalak si pentar rikut ras talentana guna erbahan ras ngkuhi kegeluhen enda. Kerina e pemere Dibata guna kiniulin geluh manusia. Mulihi man banta kuga kita nandai erbage talenta silit ibas kita guna si pakai man kemulian Tuhan? Dinging kuga ka kita ngergai kalak pentar sidebanna ibas ncidahken pemeteh ras kebeluhenna ibas erbage hal termasuk teknologi ibas doni enda? Perlu kal jadi perenungen man banta, la saja kita meteh makesa ras menikmati erbage ulih kepentaren e tapi pe ibas makesa sigejab maka luar biasa Dibata si enggo nepa doni ras mereken kegeluhen man banta, enggo mereken kepentaren man teman-temanta si ndatken ras erbahan sienda kerina.

🔗 Ergai ulih kepentaren temanta alu ngataken bujur man Tuhan